

**Акафист Пресвятой Богородице
в честь чудотворной иконы Ее
«Выдропусская – Одигитрия»**

Кондак 1, глас 8, Взбранной Воеводе:

Избранная от родов древних Пресвятая Богородице Одигитрие,
Заступнице всех к Тебе притекающих,
скорая Услышательнице и милостивая Предстательнице,
со умилением припадаем ко Твоему Пречистому образу и глаголем:
отверзи очи сердца наших, грехми омраченныя,
во еже познати нам путь покаяния.
Темже благодарственне вопием Ти:
Радуйся, Богородице Одигитрие,
на спасения стези нас наставляющая.

Икос 1

Ангели и архангели воспевают Тя выну: радуйся, Царице Небесе и земли, Ты
бо честнейши всех бесплотных сил явилася еси, яко из Тебе воплотися Господь наш,
долу снисшедый спасения нашего ради. Ныне же, яко усердная Молитвенница о
роде христианстем, путеводиши всех чтущих Тя в селения горняя, да взываем Ти
сице:

Радуйся, Путеводительнице благая;
радуйся, кающихся Предстательнице.
Радуйся, Свет спасения миру явившая;
радуйся, из мрака неверия изводящая.
Радуйся, двери покаяния нам отверзающая;
радуйся, Боговедению нас научающая.
Радуйся, в скорбех милостивая Утешительнице;
радуйся, в час судный всемогущая Ходатаице.
Радуйся, Богородице Одигитрие, на спасения стези нас наставляющая.

Кондак 2

Видяще на месте пустынном, идеже бе храм во имя великомученика Божия Георгия, дивную икону Твою Одигитрию, в пламени страшном невредимо пребывшую, и обретше ту с велиею радостию, жителие веси Выдропусския возопиша Богу: Аллилуия.

Икос 2

Разумев сын боярский и воин великаго князя московскаго Иоанна икону Твою, яко сокровище драгое, дерзостно похити ю и пренесе во отчину свою, град Муром, и тамо постави велию святыню сию во храме святителя Николая, да и муромстии людие воспоют Тя, глаголюще сицевая:

Радуйся, икону Твою из огня невредимо изведшая;

радуйся, пламень душевных страстей в нас угашающая.

Радуйся, скорая Помощнице Тя призывающих;

радуйся, Заступление Тя почитающих.

Радуйся, междоусобныя брани скоро утишающая;

радуйся, братолюбие и мир водворяющая.

Радуйся, земли Русской дивное сокровище;

радуйся, яко по всей вселенной славится имя Твое.

Радуйся, Богородице Одигитрие, на спасения стези нас наставляющая.

Кондак 3

Сила Вышняго возбуди ветр велик и страшен зело, трус крепок и гром силен, егда сын боярский Тя, Царице Небесная, Пленницею наименовав, повеле моление совершити пред иконою Твоею Одигитриею. И абие разверзошася кровы церковныя, и падоша на лице свое священник и вси людие, узревше икону сию на воздухе уносиму далече. Мы же велию чуду сему ужасающеся, вопием: Аллилуия.

Икос 3

Возымев сокрушение сердечное о неразумии своем, сын боярский возопи:
«Увы мне, безумному! Како дерзнух аз, грешный, пленити Ту, Еюже весь мир
свободися от греха и работы вражия! Ныне посрамленный дерзостию своею, каюся
и молю Тя, Пречистая, даждь ми неосужденно воспевати Тя сице:

Радуйся, мир Рождеством Твоим свободившая;

радуйся, чудо всем на покаяние сугубое открывшая.

Радуйся, яко икона Твоя ангелы бысть носима;

радуйся, яко святыня сия и человеки чтима.

Радуйся, гордым вразумляющее противление;

радуйся, смиренным благодати ниспослание.

Радуйся, к созерцанию славы Божия нас возвышающая;

радуйся, к покаянию сердечному нас обращающая.

Радуйся, Богородице Одигитрие, на спасения стези нас наставляющая.

Кондак 4

Бурею странною восхищена бысть чудная икона Одигитрии и, аки на крилу
ветреню Небесными Силами носимая, по триех месяцех из града Мурома в весь
Выдропусскую, паки возвратися. Темже зряще святыню сию, на воздухе носиму,
селянин Флор удивися, пономарь же Феодор, во олтари на святем престоле оную
обрет, созываше вся люди, благодарне вопия Богу: Аллилуия.

Икос 4

Слыша о чудесном Твоем отшествии, сын боярский, в покаяние пришед, и
востав, иде паки в весь Выдропусскую, постом в нищетне образе себе утруждая
исповедати безумие свое, и обрете тамо прощение, слезно взывая сице:

Радуйся, согрешающая скоро вразумляющая;

радуйся, кающихся от Себе не отревающая.

Радуйся, прелагающая слезы на веселие;

радуйся, подающая велие радование.

Радуйся, надежная Заступнице на Тя уповающим;

радуйся, скорая Помощнице к Тебе притекающим.

Радуйся, яко от Тебе чудеса многая исходят;

радуйся, яко о Тебе всякая тварь радуется.

Радуйся, Богородице Одигитрие, на спасения стези нас наставляющая.

Кондак 5

Боготечной звезде уподобися пречестная икона Твоя, Одигитрие, та бо приведе волхвы к вертепу Божию, пред Твоим же святым образом вернии преклоньше колена, благоговейно воспевают: управи, милосердная Мати, путь жития нашего ко Отечеству Небесному, занеже пришельцы есмы в мире сем, да взываем Сыну Твоему и Богу: Аллилуия.

Икос 5

Видяще дивную икону твою Одигитрию, земли Тверской дарованную, и благословение Матернее подающую всякому путешествовати хотящему, молим Тя, да не токмо от злаго обстояния ны избавиши и целы сохраниши, но и души наша ко благоугождению Божию направиши. Темже и мы, пречуднаго покрова Твоего сподобитися желаяще, благодарственно вопием Ти:

Радуйся, притекающих к Тебе тихое пристанище;

радуйся, уповающим на Тя спасительная крепосте.

Радуйся к горним селением ум наш возводящая.

радуйся, дольних суеты отрвати нас подвизающая.

Радуйся, немощи и язвы врачевание;

радуйся, искушения и недоумения истребление.

Радуйся, пути правыя благословляющая;

радуйся, единому Господу служити устремляющая.

Радуйся, Богородице Одигитрие, на спасения стези нас наставляющая.

Кондак 6

Проповедница бысть икона Твоя, Путеводительнице, множества милостей Твоих, яже излила еси притекающим к Тебе: скорбнии бо прихождаху, моление

приносяще милосердию Твоему; приемлюще же скоро избавление от многообразных немощей душевных, вкупе и телесных, поведаху всюду заступление и чудеса Твоя, со умилением вопиюще Богу: Аллилуия.

Икос 6

Возсия в веси Выдропусской благодать от иконы Твоя, Владычице: срединное бо место явися весь сия царствующей Москве и Петрову граду, освящая и благословляя землю нашу Русскую, молиши бо неусыпно Сына Своего Превечнаго Бога о даровании стране нашей мира и благоденствия, избавления от междоусобных брани и всякия скорби и печали. Темже славословим Тя сице:

Радуйся, честным Твоим омофором державу нашу покрывающая;

радуйся, Русь Святую Своим уделом именующая.

Радуйся, от лет древних во бранех со иноплеменники помогающая;

радуйся, призывающим имя Твое победы умножающая.

Радуйся, правители и власти умудряющая;

радуйся, судьбы Отечества ко благу устрояющая.

Радуйся, помощи наша и утверждение;

радуйся, упование наше и вразумление.

Радуйся, Богородице Одигитрие, на спасения стези нас наставляющая.

Кондак 7

Хотя Господь явити человеколюбие Свое не токмо веси Выдропусской, но и всей православней Русской земли, устрои пренесение иконы сея по градом и весем, во обители иночествующих и дома богобоязненных христиан. Темже, яко Саму Царицу Небесную сию икону чтуще, восхваляем с любовию творимая от нея чудеса, поюще Богу: Аллилуия.

Икос 7

Новый источник милостей явися икона Твоя Одигитрия, страждущим бо ослабы посылаются, немощствующим здравие, пленником свобожделение, заблуждшим обращение, коемуждо познание величия Твоего даруется, зане

молитва, яже к Тебе, Пречистая, возносимая, непреложно услышана бывает. Темже и заступление Твое многосильное обретаем и благодаряще воспеваем Ти сице:

Радуйся, наше всемогущее заступление;

радуйся, от всякия напасти ограждение.

Радуйся, сирых и убогих приятелище;

радуйся, дев и вдовиц честных прибежище.

Радуйся, супругом целомудрие и единомыслие подавающая;

радуйся, чада во благочестии и послушании жити наставляющая.

Радуйся, прошения благоговейных молитвенников исполняющая;

радуйся, лютыя беды от нас отгоняющая.

Радуйся, Богородице Одигитрие, на спасения стези нас наставляющая.

Кондак 8

Странствие земное совершающих, огради нас Твоим заступлением, Пречистая Дево, изведи из глубины грехов и бури отчаяния, моря житейскаго пучину помози невлажными проити стопами, мысленнаго фараона потопляючи, да спасаеми Тобою дерзновенно возопием Богу: Аллилуия.

Икос 8

Вся в вышних пребываючи, и нас земнородных не оставила еси, Владычице: коегождо бо въздыхания сердечная слышиши и призираеши на прошения верно взывающих к Тебе: нивы сельныя благословляеши и бразды житныя освящаеши, во еже быти добрым плодом от земли нашея, исполняючи моления людей Твоих о хлебе насущном, вопиющих Ти сице:

Радуйся, благорастворение воздухов низпосылающая;

радуйся, во гладе сущих нас не оставляющая;

Радуйся, усердных делателей моления приимающая;

радуйся, на небесныя сокровищницы уповати тех подвизающая.

Радуйся, незримое веры семен прозябение;

радуйся, зерен благочестия изрядное насаждение.

Радуйся, плод сторичный приносити нас сподобляющая;

радуйся, пищею небесною нас питающая.

Радуйся, Богородице Одигитрие, на спасения стези нас наставляющая.

Кондак 9

Всякое естество бесплотных воспевает немолчно величия Твоя, Дево. Ангели бо незримо поклонение пред Твоею иконою творяще, фимиамом небесным пред нею каждение совершают. Мы же, земнороднии, како достойно восхвалити Тя возможем? Ибо всякое благодарение не превосмогает множества милостей Твоих. Темже и припадающе к Твоему святому образу, идеже Ты держиши на руках Своих Богомладенца Христа, хвалебную песнь воспоем Зиждителю всех: Аллилуия.

Икос 9

Ветия многовещанная недоумеют, како возможно изъяснити множества чудес, от иконы Твоя изливаемая. Ты бо пути заблуждших исправляеши, маловерная вразумляеши. Мы же, не дерзающе испытати величия Твоя, благоговейно воспеваем Ти сице:

Радуйся, истинная веры Наставнице;
радуйся, надежды несумненные Подательнице.

Радуйся, любви нелицемерная взыскание;
радуйся, мудрости небесная стяжание.

Радуйся, отеческого предания Хранительнице;
радуйся, веры святых апостол Защитнице.

Радуйся, ереси тьмочисленная разоряющая;
радуйся, правое богочитание насаждающая.

Радуйся, Богородице Одигитрие, на спасения стези нас наставляющая.

Кондак 10

Спасти хотя от поругания икону Твою Одигитрию, благочестивый селянин Стефан, видя, яко безумнии отступницы веры отеческия восхотеша ввергнути во

огнь святыню храма Выдропуссаго, откупи ю у безбожных за един дровяный воз, и благоговейно внесе в дом свой, благодаря Бога: Аллилуия.

Икос 10

Стена крепкая явися стране нашей икона Твоя, Владычице, яко Ты никогдаже оставляеши милостивное Свое о народе христианстем попечение, аще бо разорени и поругани храми Божии быша, и нечестивии людие святыни похулиша и истребиша. Но помиловала еси ны и благословила еси пребывати иконе Твоей Одигитрии в земли Тверской в дому благочестиваго Стефана со Матроною и чадами их. Богомольцы же Твои тайно прихождаху в дом сей, и припадающе к надежной пред Богом Заступнице, слезно взываху Ти сице:

Радуйся, во исповедании Православия нас утверждающая;

радуйся, благодарити за скорби и тесноты вразумляющая.

Радуйся, безумия богоборцев обличение;

радуйся, омраченных безбожием исцеление.

Радуйся, усердных служителей Своих утешающая;

радуйся, оным обители Небесныя уготовляющая.

Радуйся, милостиваго всепрощения источнице;

радуйся, верным молитвы за враги дарование.

Радуйся, Богородице Одигитрие, на спасения стези нас наставляющая.

Кондак 11

Пение вознося доброгласное пред честною иконою Твоею, усердно просим Тя, Богомати, услыши моления наша, к Тебе возносимая. Умоли Владыку Христа избавити отечество и народ наш от погибели и сохрани в нас веру православную, да со умилением благодарственно едином сердцем и единими усты вознесем хвалу Богу: Аллилуия.

Икос 11

Светоприемной свечи уподобися икона Твоя Выдропусская, благодатию от нея излиянною дивно показующи нам тайны божественныя и научающи

ангельскому житию. Темже и воина Кронида, иже споспешествовал ест сопружником честным Стефану и Матроне сохранить образ Твой святой, препроводила еси во обитель Псково-Печерскую, и тамо иноческий образ восприяти с именем Нафанаил сподобила еси. Сей же молитвы делатель усердный, мудростию и мужеством преукрашенный, до последняго издыхания исповедаше Твое благое о нас попечение, вопия Ти похвалы сицевыя:

Радуйся, евангельским путем шествовати нас побуждающая;

радуйся, волю Божию взыскати и творити повелевающая.

Радуйся, иноческаго образа небесная Покровительнице;

радуйся, обителей земных, во образ обителей горних, добрая Устроительнице.

Радуйся, непрестанную молитву стяжевати назидаящая;

радуйся, ума и сердца чистоту созидающая.

Радуйся, благоговейно пред Богом ходити воскриляющая;

радуйся, даже до самыя смерти обеты монашеския хранити укрепляющая.

Радуйся, Богородице Одигитрие, на спасения стези нас наставляющая.

Кондак 12

Благодатию божественною защиты ны, Дево Непорочная, от пленения врагу падшия воли нашея и козней диавольских, и яко младенцы алчущия, ни во чтоже вменяюще бисер и злато, приничут ко млеку матерню, тако и души наша умудри искати упокоения токмо во Едином Господе нашем, да познавше Его благость, воспоем: Аллилуия.

Икос 12

Поюще заступление Твое, Пресвятая Владычице, молим Тя: буди нам благая предстательница в оный день страшный, егда во славе придет Праведный Судия, Сын и Бог Твой, да не уподобимся смоковнице бесплодной, да не сопричтемся лукавому рабу, но восприимем часть мудрых дев, со светильники горящими, исполненными елея милости и добрых дел, величающе Тя тако:

Радуйся, упование наше в день судный;

радуйся, умоление за ны в час испытания.

Радуйся, огня неугасимаго избавляющая;
радуйся, во избранное стадо Христово нас собирающая.
Радуйся, душу полагаги за други призывающая;
радуйся, сердца наша милующими быти сотворяющая.
Радуйся, Ты бо еси Ходатаица помилования грешником кающимся;
радуйся, Ты бо вводиши верныя в радость Господа Твоего.
Радуйся, Богородице Одигитрие, на спасения стези нас наставляющая.

Кондак 13

О Предстательнице наша непостыдная, Пресвятая Богородице Одигитрие, приими наше возносимое к Тебе моление, и от всякаго зла сохрани, к добродетели управи, пути правы сотвори и прощения грехов наших испроси, да взирающе на святую Твою икону, воззовем к щедротам Отца Небеснаго: Аллилуия.

Этот читается трижды, затем 1-й икос и 1-й кондак.

Молитва

О Царице Небесе и земли, Владычице всемилостивая, Одигитрие всечестная, Предстательнице наша усердная, при Кресте Сына Твоего и Бога всыновившая весь падший род человеческий и по успении Своем не оставившая нас сирых и безнадежных! Молим Тя, Всенепорочная, благодать Твою не отыми от кающихся рабов Твоих и управи вся, яко Мати Преблагая: защити отечество наше, веру православную сохрани, власти умудри, иереи укрепи, верным людям Твоим помощь неоскудную даруй, юныя вразуми, старость утеши, болящия исцели, отчаянныя восстави, заблуждшия обрати и всем целомудрие и крепость исходатайствуй – Ты бо еси благая Путеводительница и милосердная Заступница, к Тебе припадаем и молим Тя: не отвержи нас, но испроси нам добраго ответа на Страшнем Судилищи, да не осудимся по грехом и беззаконием нашим, но милость улучим по безмерному человеколюбию Господа и Спасителя нашего Иисуса Христа, Емуже славу и поклонение возсылаем, со Безначальным Его Отцем, и Пресвятым и Благим и Животворящим Его Духом, ныне и присно и во веки веков. Аминь.